

東
華
續
錄

東華續錄

咸豐二十六

臣王先謙敬編

臣陶澐宣恭校

八月甲戌諭內閣琦善奏剿擊浦口賊船並進攻揚城連獲勝仗一摺據稱七月十八日丑刻金堂門外賊船數十隻陸續駛至總兵武慶帶領大隊兵丁前往分馬步二隊更番疊進施放槍礮火箭及火藥口袋逆船爲風所阻不能退回立時延燒盡成灰燼獲有偽總帥二名副司馬一名二十一日外委姚長青帶勇赴徐凝鈔關一帶遇賊圍裏守衛葉萬春參將師長鏢馮景尼率兵援應斃賊多名二十三日西門迤南埽垢山邊有賊縋城而下經官兵施放連環槍礮斃賊六七十名又有賊匪由仙鶴嘯地方縋下經都司葉舒青色普哲訥烏勒宏阿青州駐防佐領魁斌帶領弁兵

攻擊陳金綬復親督參將那瑪善遊擊海明馳往接應開放槍礮擊斃七八十名等語此次賊船猝至浦口經總兵武慶等督率弁兵於昏夜之中乘風縱擊痛加焚剿盡數殲擒實屬奮勇出力著傳旨嘉獎其揚州逆匪亦經官兵截剿疊獲勝仗賊勢已極窮蹙著該大臣等仍督飭各路兵勇迅卽克復揚城毋任賊匪乘間竄逸○諭沈兆霖奏請飭各處團練保衛城池等語前因逆匪各處紛竄勾結土匪擾害鄉閭疊經降旨令各省仿行嘉慶年間堅壁清野之法或築寨濬濠或嚴守險隘原期守望相助互衛身家所有團練壯丁自不宜遠行徵調若本邑城池有警則附近村堡團練必應糾集壯勇合力援應使賊進無所據退無所掠自不難一鼓殲除著各路統兵大臣督撫等剴切曉諭辦理團練各紳士凡附近郡縣鄉村一遇賊匪竄擾城池卽行會同官兵併力攻擊慎

勿株守一隅致有疏失蓋城池爲一方保障官民聯爲一氣斯卽
眾志成城之效鄉團中如有援城殺賊立功者卽行奏請優獎以
示鼓勵其隔府州縣仍不得遠行徵調以免擾累將此通諭知之
○諭軍機大臣等沈兆霖奏遵查賊匪所過地方滋擾情形一摺
據稱專遣家丁至南康府城探詢五月十四日賊船尙未到城卽
有居民百餘人將署星子縣知縣羅雲錦擁至城內偏東之同善
堂看守隨即劫獄放出監犯十五日署知府恭安往城隍廟行香
居民又擁至同善堂與署知縣一同拘管十六日賊船到南門外
未及登岸居民卽將守令獻出並餽賊銀米雞豚等物都司胡瑤
林乘馬出城亦被居民圍住執送賊船傳聞府縣都司見尙被賊
拘禁並聞署知府恭安已經拘斃等語覽奏實深駭異此等土匪
劫官餽賊實出情理之外殊堪痛恨著張芾再行派人嚴密訪查

如果實有其事卽將爲首匪犯按名訪拏盡法懲辦其府縣都司等是否見在賊船拘禁署知府恭安有已經拘斃之說是否屬實湖口彭澤各城果否保守完固著一併查明據實具奏毋得稍有諱飾又據沈兆霖片奏賊船下竄誠得下游用戰船由湖口而入內外夾攻不難聚而殲旃聞省中見亦籌辦湖口堵截等事不知此時能否兼顧若聽其紛竄搶掠勢將何所底止應如何豫備戰船及雇覓民船堵截竄擾之處著該撫與陳孚恩江忠源及地方官紳等迅速籌辦妥爲布置仍隨時知照湖北並下游各省一體設法堵截毋任賊踪往來竄駛致滋蔓延將此由六百里諭令知之○乙亥諭軍機大臣等訥爾經額等奏續獲勝仗一摺並擬親統馬步兵分隊環攻等語逆匪屢經痛剿堅匿不出經托明阿勝保移營逼近賊壘該匪出巢抗拒我兵截剿焚毀附壘瓦屋殲斃

賊匪甚多松玉德坤等亦各有斬獲復經訥爾經額恩華派撥馬步各隊馳赴丹河郝光甲烏勒欣泰馳往水北關分路夾攻逆匪屢挫兇鋒急宜乘勝進剿訥爾經額恩華擬於二十九日親統馬步全隊於丹河口岸紮營分隊環攻並暗用地雷另堆土壘拆賊木柵以期立破賊巢所辦均合機宜惟於丹河口岸紮營距賊巢遠近是否得力該大臣等仍應督率鎮將渡河攻剿與托明阿勝保等聲勢聯絡南北夾擊使賊匪腹背受敵方能立解城圍至賊巢既破尤須嚴防竄逸西南一帶尙覺空虛應如何撥兵堵剿杜賊紛竄之路均宜隨時籌辦毋稍疏忽將此由六百里各諭令知之○諭奕經奏宿遷地方帶兵事務請飭接辦糧臺之道員統帶等語宿遷爲清江後路安設河南江南兩省糧臺最關緊要陳啟邁業經馳赴江蘇藩司新任所有前次派防之山西兵一千一百

五十名卽著接辦糧臺之廣東高廉道法良統帶隨時相機調遣其選練壯健河兵扼要布置事宜並著法良一手經理以專責成至所奏徐州近日辦理情形及捕獲捻匪多名見在揚州賊匪急圖紛竄該侍郎務當會商周天爵嚴密設防隨時偵探無稍疏懈將此由五百里諭令知之○諭舒興阿奏酌調防兵先赴河南府相機進剿一摺昨因懷慶西路兵力稍單降旨令舒興阿督兵渡河合力進攻斷賊接濟並杜賊西竄之路茲據奏稱河北逆匪意圖過河南竄若官兵全數北渡則南岸空虛難於措手所慮不爲無見該督見駐河南府距孟津渡口不過三十里甚爲切近巡查自易周密該處先有珠克登所帶官兵一千餘名合之該督所帶已及三千數百餘名如果賊匪窮蹙南竄儘足截剿惟過於旣竄之後尤須防於未竄之先其緊要渡口旣駐重兵而偏僻港汊亦

應嚴密偵察如果北岸實無一船而南岸渡河之具亦能收藏淨盡逆匪自無從偷渡所稱賊製羊皮渾脫此項器具非賊所能猝造難保不有土匪勾結尤應嚴拏奸細方能絕其竄路至懷慶城外各路軍情據連日奏報南面偏賊較緊而兵力稍單北路兵數較多又爲丹沁兩河所隔一時尙未能聯絡前所以命舒興阿督兵北渡者不但防賊西竄亦以添助南路使得迅解城圍該督斟酌見在情形如河南布置已妥河北仍須接應卽行督兵渡河會勦勿誤事機將此由六百里諭令知之○諭舒興阿奏副將珠克登等統帶官兵一千餘名駐防孟津渡口沿途向地方官支領口糧概以未奉該省上司明文推諉等語征兵遠行糧餉最關緊要各省遇有軍務例由駐兵處所及經過州縣供支鹽糧等項卽使不敷支放亦當先期妥籌墊用何得以未奉本省上司明文拘泥

推諉著陸應穀查明該官兵自潼關至孟津缺乏口食至五日之久係何處地方官託詞不肯供支卽行據實奏參見在懷慶尙未解圍各路援兵會集所需餉銀著該撫嚴飭各屬隨時籌款供支毋稍遲誤至該省被兵處所民間蕩析離居殊堪軫念其稍有餘力者諒已集貲團練各抒惻忱若再將應徵錢糧照常徵收民力更恐拮据著陸應穀慎委賢員詳細確查應如何酌量蠲緩之處迅卽馳奏候朕施恩將此由五百里諭令知之○丙子諭內閣本日據訥爾經額恩華托明阿勝保由八百里馳奏官兵攻破賊巢懷慶城圍立解一摺逆賊渡河北擾攻圍懷慶環城築壘大肆猖獗經朕特命大學士直隸總督訥爾經額爲欽差大臣尙書恩華將軍托明阿內閣學士勝保幫辦軍務督率各路精兵會合進剿托明阿勝保與善祿等由郡城東南一帶疊次進攻大獲勝仗恩

華等由丹河東北率兵進剿亦屢有斬獲該逆負隅抗拒將屆六旬城中文武紳民極力守禦朕軫念生民方深焦灼七月二十八日該大臣與尙書恩華親督侍衛托雲保蘊秀前任河督文沖六品頂帶奕紀運司楊霈並各鎮將文武員弁練勇兵丁直過丹河徑撲賊壘該逆分四股撲出抗拒我兵分作五路以四路迎擊賊隊以一路從中直衝木柵復督吉林黑龍江馬隊從旁分路鈔進我兵人人奮勇爭先搶入木柵並用火具一齊拋擲烈燄飛騰木柵房屋焚燒幾盡其柵外賊匪見柵內火起歸路已斷紛紛敗走經兵勇追擊殲斃五六百名斬獲首級百數十顆托明阿勝保會同善祿等移營逼近賊壘晝夜攻剿並張貼告示解散脅從密用反間離其腹心悔罪投誠者不下數百人適恩華舒興阿將火箭等物解到勝保卽於二十八夜選派兵勇暗撲賊壘兵勇隨進隨

攻道匪四路狂奔我兵往來截殺約數百人西凌阿明慶雙成烏
凌額等帶領馬隊生擒四十餘我兵縱火焚燒賊巢守城文武亦
派兵勇總城助戰總兵郝光甲烏勒欣泰並各督兵接應四面圍
攻統計斬獲賊匪二千餘名奪獲槍礮一百五十餘件黃旗大小
四百餘面器械贏馬無算懷慶城圍立解零星餘匪倉皇逃潰旋
於二十九日有頭戴黃巾乘坐竹轎之逃竄賊目一名兵勇立即
捕拏卽有從匪數十人上前奪護該兵勇卽將該賊目掙出轎外
割取首級並生擒搶護之賊匪十八名救出被脅難民二百餘人
當將米糧運入郡城接濟民食托明阿勝保善祿入城安撫紳民
人心大定此皆仰賴 天恩默加眷佑朕心寅感倍增訥爾經額
運籌決策調度有方著加恩賞戴雙眼花翎並穿黃馬褂恩華托
明阿勝保幫辦軍務與善祿西凌阿力籌攻剿謀勇兼施洵堪嘉

尙恩華著賞穿黃馬褂托明阿著賞穿黃馬褂並賞給西林巴圖魯名號勝保著賞加都統銜並賞穿黃馬褂給予霍鑾巴圖魯名號善祿著賞戴花翎並賞給斐里巴圖魯名號西凌阿著開復都統原官仍加恩賞戴花翎以示嘉獎懷慶府守城文武官員前經降旨加恩念其力保危城始終不懈允宜再沛恩施以爲守土者勸道員用懷慶府知府余炳燾著賞加按察使銜知府用河內縣知縣裘寶鏞著賞加道銜候補游擊程奇賢著賞加副將銜仍與在事出力文武員弁及守城官紳兵勇與首先登柵奮勇尤著之兵勇均著該大臣等查明迅卽保奏候朕施恩軍機大臣祁寯藻麟魁邵燦彭蘊章穆蔭夙夜在公贊襄樞務允宜先沛恩施均著賞軍功加一級兵部捷報處郎中成著賞軍功加一級委署主事恆興筆帖式國英均著賞戴朝冠仍各賞給軍功紀錄一次員

外郎舒弼文成主事壽齡筆帖式奎璋潘德成景新均著賞給軍功紀錄三次此次懷慶解圍逆匪殲除殆盡大河南北生民重登衽席軍威大振不難水陸並下直抵江南惟琦善向榮均係特簡大臣各統重兵攻圍金陵揚城均經數月之久株守無功若必俟北軍南下助剿始克奏功能無汗顏且朕於諸大臣倚爲干城切望同膺懋賞尙其同心勦力迅圖克復三城綏靖南疆式符朕望○諭軍機大臣等訥爾經額等奏官軍攻破賊巢斃賊殆盡懷慶城圍立解一摺該逆屢受懲創猶復負隅抗拒經訥爾經額恩華托明阿勝保善祿等晝夜攻剿殲斃殆盡立解懷慶之圍並運糧接濟民食入城宣布德意不但圍郡紳民同聲欣感卽河北各郡人心亦可大定惟零匪西竄雖爲數無多而奔突性成難保不散而復聚該大臣等派委將弁分帶馬步各隊官兵跟蹤追剿勝保

亦擬親督兵勇追躡其後並據稱知照哈芬陸應穀長臻王履謙
珠克登等一體堵截嚴密搜緝務期悉數殲除勿畱餘孽斷不可
因城圍已解屢勝之後稍涉大意其割取首級之乘轎賊目係何
姓名其逆首林鳳詳李開芳受礮傷後是否業已殲斃卽向生擒
各匪內細心研鞫如尙未殲擒必應迅速躡緝勿令免脫該郡甫
解倒懸瘡痍未復該大臣等督兵分駐彈壓卽飭令地方官鎮撫
兼施以副朕軫念窮黎至意將此由六百里加緊各諭令知之○
河南巡撫陸應穀奏七月十五日南路擒匪千餘人攻圍沈邱縣
城該縣知縣馮諫受傷適有經文岱派往之參將慶瑞在城協同
紳民防守該匪用大礮雲梯四面猛攻經慶瑞擊斃擒首侯姓等
數人賊匪退走經文岱復派已革參將達凌阿帶兵五百名項城
縣知縣沈棠亦帶練勇二百名於十六日往援行抵沈邱柏樹林

遇大股捻匪列陣拒捕兵勇奮力衝擊斃賊四十餘人生擒捻首
劉元吉等四人正法匪眾南奔分股渡河竄逸見在經文岱督兵
至沈邱並知會安徽阜陽各軍會剿不日諒可殲除報聞○戊寅
諭軍機大臣等據裕瑞奏查明川省各標鎮協營出師存營各兵
確數一摺據稱川省原額兵三萬三千八十一名疊次奉調出師
及本省派防實存營兵雖二萬八千有餘而通省額設八十二營
分布各處俱形單弱據舒興阿咨稱擬調川兵見值防堵喫緊之
時未便再行外調等語川省與楚省毗連見在賊氛未靖籌辦防
堵尙恐不敷勢難外調自係實在情形著舒興阿體察情形如陝
西等處有必須添兵設防之處另行酌量揀調毋庸調派川兵以
期兩有裨益將此由五百里各諭令知之○己卯諭軍機大臣等
吳文鎔吳振械奏請免南掌國貢使入京一摺南掌國貢使向由

貴州湖南湖北河南各省取道進京惟見在粵匪未盡殲除楚豫一帶尙有繞越行走之處該貢使遠道輸誠若仍令照例來京轉非所以示體恤著該督撫傳旨該國使臣等此次毋庸來京仍著優與犒賞妥爲護送俾令先行回國貢物象隻卽著賞收由該督撫派員送京其應行頒賞該國長及正副使臣等銀物由該管衙門照辦齊全發交雲南派員齎送出關轉交祇領既可遂其悃忱並可免其跋涉以示朕懷柔遠人曲加體恤之至意吳文鎔已有旨調任湖廣總督令其馳驛前往羅繞典見已接任著與吳振械會同宣諭該國使臣可也將此由五百里各諭令知之○諭王履謙長臻奏拏獲逃匪請分兵移紮孟津北岸並王履謙前赴各口巡查各一摺見在懷慶解圍餘匪西竄孟津渡口兩岸皆須嚴防偷渡王履謙見已帶同知府戴鸞翔等於黃河上下各口周歷巡

查無論南岸北岸均須兼顧毋稍疏懈並著長臻嚴飭河標弁兵協同地方文武認真巡防毋令竄匪乘間偷渡至西竄餘匪約有若干究係逃往何處河北見派官兵追擊情形如何並著隨時奏聞以慰廛念將此由六百里各諭令知之○戶部奏山西巡撫哈芬疏稱改鑄鐵錢變通軍餉請飭將寶晉局鑄務酌覈妥協章程奏明試辦得旨部定章程迅速具奏不可專待哈芬奏到一議覆准豈爾部反不如外省耶○調吳文鎔爲湖廣總督以慧成爲閩浙總督未到任前仍以福州將軍有鳳署理實授裕瑞四川總督○庚辰諭內閣刑部等衙門題駁奉天省審擬楊堂詳罪名一案所駁甚是此案承德縣回民楊堂詳因妒姦謀殺米儉脫逃至二年之久潛回探信經伊父楊希孟藏匿旋被米儉堂兄米漢拏獲送官楊希孟屬畱不允爭鬪以致楊希孟被米漢砍傷殞命該府

尹以楊堂詳罪犯斬候脫逃二年後被獲照例應改斬決因逢恩詔免其逃罪仍以斬候具題經刑部以楊堂詳謀命起釁致伊父破砍殞命與謀殺人致父自盡者事同一律卽應按例擬以立決事犯雖在恩詔以前不准援免議請駁令該府尹另行按例妥擬報部該犯情罪重大毋庸交該府尹另題致稽時日楊堂詳著卽處斬其米漢一犯依擬應絞著監候秋後處決所有錯擬罪名之審轉各官著該部查取職名照例議處○諭自賊匪竄擾大河南北豫省官紳兵民人等勦力同仇登陴守禦朕心實深嘉慰昨懷慶解圍守土各官均經優予獎賞並特旨令統兵大臣將該處出力之官弁紳民兵勇查明保奏矣因思懷郡被困將近兩月竟能力捍危城保障河北固由守土官吏激勵有方亦由該郡士民深明大義允宜破格施恩用昭獎勵所有懷慶府縣學額著該部酌

量增加以爲紳民固守者勸至開封之擊退賊匪許州之保全城邑民心堅定均屬可嘉著一併賞加學額該部卽查明該府州縣學額酌擬加額名數具奏以示優獎○周天爵奏潁州府屬大股捻匪經前任宿州知州張清元等於七月十九日在亳州之耿皇寺拏獲數名解營訊辦是夜匪黨數百人前來截犯當將所獲各匪先行正法並帶兵勇分路接拏二十日至張橋鎮該匪聚集四五百人據橋攔河施放槍礮前任參將錢朝舉等督飭兵勇奮力直前馬兵季占中同把總李玉珍等先伏草間俟其槍礮一發之後飛騰上橋斃賊甚眾兵勇奪橋而鬪守兵楊進麟浮水徑渡衝入賊隊將匪首楊廣義殺死斬獲首級六十二顆格斃四十八名眾匪逃竄二十三日張清元等至雉河集知該處捻匪蝟集卽分兵三路設伏有本地革兵馬樂田等前來迎接聲稱捻匪逸去該

員查訪知馬樂田卽係捻首維時捻匪總頭目馬老虎四面埋伏約二三千人蠶擁而來張清元等分頭迎敵把總連丕甲等帶兵攔腰衝擊馬兵馬能何伏禮奮勇向前砍殺首犯馬老虎匪黨自相踐踏死者無數另股捻匪四五百人從河下偷渡鈔我後路經把總李璋開礮轟斃二十八名接獲捻匪主謀馬惡一名餘皆逃遁惟有窩家馬振剛未獲見仍飭令趕緊接捕所有出力之張清元等懇恩獎勵 上諭安徽潁州府屬捻匪疊次搶掠拒捕實屬罪大惡極該員等倉卒應敵皆有條理深堪嘉獎所有出力之坐補安徽宿州知州張清元等免其坐補原缺以知府卽行補用先換頂帶並賞戴花翎已革參將錢朝舉著准其免罪開復遊擊朱連泰著以參將升用遇缺卽補並賞戴花翎署循化營守備袁學忠著以都司卽補並賞戴藍翎署洮岷協營把總連丕甲署河州

鎮標左營把總李玉琛總制外委李章起均著以千總拔補並賞加守備銜賞戴藍翎兵丁馬能何伏禮季占中周恆義楊進麟均著以把總拔補並賞戴藍翎民人鄭朋山著賞給六品頂帶以示鼓勵未獲之擒首馬樂田窩家馬振剛及此股餘匪著該侍郎卽飭帶兵各員弁悉數搜擒毋任一名漏網○諭軍機大臣等寄諭兵部尙書桂良昨因懷慶解圍餘匪西竄業據各統兵大臣跟蹤追躡復諭令舒興阿哈芬等一體嚴密堵剿本日據郭夢齡奏稱該逆於八月初二日竄入山西垣曲縣亟須添兵合剿以杜北竄之路等語見已諭知訥爾經額迅速派兵由澤州一路截剿並分兵由獲鹿井陘一路入山以爲太原後路接應直隸爲畿輔重地所有毗連山西各要隘該尙書仍當隨時妥爲布置慎密設防並須緝拏土匪盤查奸細勿任勾結爲患但須持以鎮靜不可稍涉

張皇將此諭令知之○諭本日據郭夢齡奏賊匪竄入晉境擾及垣曲一摺據稱該匪由懷慶府屬濟源縣竄入晉境於八月初二日圍垣曲縣城北門已開所有前派督辦防堵之河東道張錫蕃垣曲縣知縣晏宗望均無下落該縣距省九百里澤州平陽等郡均與毗連亟宜迅速剿辦著該大臣等迅派精兵由澤州入山探明賊蹤迎頭截擊並著官兵由正定府獲鹿井陘一路入山以爲太原後路接應前經調防直隸之山西官兵即可令其折回晉省以資攻剿山西與直隸處處毗連關繫甚重想該大臣等定能通籌全局迅速布置也又據勝保奏稱督兵追剿情形已與善祿西凌阿等兩路進剿由封門山邵原關濟源順黃河一帶直赴垣曲矣西竄賊匪數尙不少勝保統兵追剿必須將士用命方能有濟卽如總兵郝光甲前經托明阿勝保調赴西路堵截若卽遵調早

渡沁河前往何至該匪從此路竄逸著訥爾經額嚴飭該總兵等
星速追剿如再有延誤定卽重治其罪勝保等裹糧進行鑼鍋帳
房未及帶齊著卽催令糧臺迅速運送前進其火藥鉛丸均著隨
時接濟毋令匱乏將此由六百里加緊諭令知之○諭本日據郭
夢齡奏賊匪於初二日由濟源之封門口竄入垣曲縣城請調重
兵赴晉分投堵剿一摺該縣北界平陽西鄰河東距省亦不及千
里惟該省官兵調赴他省已九千餘名巡撫哈芬甫於初二日自
澤州前赴陽城尙未知垣曲失事是該處兵力旣單聲勢亦不聯
絡賊匪自懷慶敗竄之後奔突而西及早剿除尙易淨盡否則一
路搶掠裹脅恐又成滋蔓難圖之勢前據訥爾經額等奏派托雲
保松玉烏凌額吳燦達爾濟並善祿西凌阿郝光甲烏勒欣泰分
帶馬步隊跟蹤追剿勝保卽於初二日拔營親督兵勇前進諒必

探明賊蹤設法兜捕茲已諭令訥爾經額等迅卽督飭鎮將大員帶兵由澤州一路鈔出賊前迎頭截擊著托明阿卽統兵馳往與勝保善祿合力夾攻乘賊匪喘息未定一鼓殲除萬勿稍有遲誤仍將剿辦情形隨時馳奏以慰廑懷其河東道張錫蕃垣曲縣晏宗望有無逃避情事與平澤蒲絳各屬防守事宜能否得力一併查明具奏將此由六百里加緊各諭令知之○勝保奏臣自懷郡解圍後一面接拏零匪安撫居民一面分兵派員跟蹤追剿提臣善祿先帶兵前進臣於八月初二日督率將士徒步裹糧而行鑼鍋帳房不及隨往是日行抵濟源縣探知逆匪竄至焚擄村鎮圍攻縣城聞大兵已到復從西竄士卒沿途追剿斬擒百數十名查濟源西路毗連山西垣曲山徑崎嶇逆匪被創狂奔是其長技我兵裹糧徒步率多疲乏勢恐尾追不及見與善祿西凌阿函商兩

路進剿一由封門走邵原關前進一由濟源順黃河一帶直赴垣曲以便會剿臣慮懷慶西路空虛屢次札調總兵郝光甲速渡沁河杜賊西竄無如該鎮以駐守七里橋爲詞半月之久未肯移營渡沁以致餘匪西竄事機不宜再誤應請飭下統兵各大員並山西撫臣速派得力弁兵於垣曲西北各隘口實力截剿臣等仍趕緊追擊以期及早殲除不畱餘孽上諭見在勝保與善祿西凌阿分路進剿而該逆已竄入垣曲且賊首傷而未死匪黨尙有數千更恐分股竄突搶掠裹脅又成巨患山西省籌辦防堵如封門山等處有險可恃竟被賊匪衝過可見該省辦理全無實際勝保見已賞加都統銜統兵追剿事權必須歸一所有各路大營追剿官兵俱著准其調遣以專責成山西本省將弁兵丁亦准酌量調撥如有著漏光甲之不遵節制遲延貽誤者卽行嚴參治罪山西

兵力太單哈芬又未悉賊情恐其布置不能周密勝保善祿西凌阿等既分兩路進剿務須設法繞出賊前或飛咨哈芬令將何路官兵調至何處庶可前後夾擊不至縱賊四竄也將此由六百里加緊諭令知之○諭本日據郭夢齡奏賊匪西竄擾及垣曲亟請添派重兵赴晉堵剿一摺舒興阿見駐河南府城著卽就近派委鎮將大員統帶官兵由平陸之茅津渡星馳前往應援與勝保等合力夾攻總須鈔出賊前不令竄入平陽蒲絳一帶此股賊匪敗竄之餘迅速兜圍可期埽除淨盡總兵郝光甲與烏勒欣泰先由訥爾經額派往追捕該總兵等由何路進兵卽著該督飭令飛速前進毋稍遲誤其黃河渡口有珠克登帶兵巡防仍當嚴飭偵察潼關一帶與山西河南毗連均須加意防守不可稍有疏虞將此由六百里加緊諭令知之○諭本日據哈芬奏太行一帶布置周

安該撫啟程折回陽城據該撫所奏二十七日卽探聞濟源之白
義村有賊匪四五百人盤踞尙在懷慶城圍未解之先據稱飛咨
訥爾經額撥兵往剿何以垣曲尙無準備該撫此次所報僅防陽
城各隘於垣曲防守並未敘及是又墮逆賊避實擊虛之詭計見
在本省兵力不能分撥出剿該撫已抵陽城急應前往扼要地方
繞出賊前截擊萬不可稍涉遲延再有貽誤山西素鮮土匪逆黨
驟難煽脅惟民情素懦重身家而怯戰鬪若地方官聞警驚惶先
將眷屬遷移必致居民紛紛逃避著該撫嚴諭各屬地方文武聯
絡紳民悉力防禦但能固守城池援兵一到立可殲除此卽堅壁
禦寇之善策澤州府在籍御史王通昭聞其倡辦團練頗有成效
卽傳旨諭令督率練勇商同本籍紳士妥爲保衛潞安一帶防守
亦關緊要儻賊匪由澤潞一帶分路竄入蔓延更不可問署臬司

郭用賓見駐太行卽責成嚴防不可稍有疏失哈芬遠在省南所有省城一切籌防著藩司卽督飭文武員弁並與特派幫辦之前任太僕寺少卿徐繼畲及前任鴻臚寺卿賈克慎前任內閣侍讀學士郭景僖等商同辦理總以鎮定人心爲要若官眷先移以致民情搖惑卽著嚴參重治其罪河東道張錫蕃垣曲縣知縣晏宗望是否先期逃避著該撫與該藩司一體嚴查儻有棄城先遁情形卽著革職拏問按軍法從事斷勿姑容防守隘口各官兵是否遇賊卽潰亦著查明具奏蒲解等處逼近陝省尤應亟籌堵禦著卽知照舒興阿張祥河飭令派防文武一體嚴查至勝保進剿赴晉之兵應需糧餉著該撫與該藩司卽飭承辦糧臺之員隨時接濟毋稍缺乏將此由六百里加緊諭知哈芬並傳諭郭夢齡知之○辛巳諭內閣朕惟致治之方安民必先察吏各省府廳州縣皆

係親民之官如能戢暴安良畱心教養俾小民咸趨正業何至惑於邪說相習爲非自軍興以來被賊滋擾地方固因奸民煽亂亦由吏治廢弛釀成巨患卽有一二循良之吏力求整頓地方者或因資格較深循例遷擢又或因該管上司調署他缺未能久於其任致令司牧之官視職守爲傳舍置地方利弊於不問民風何由而淳吏治何由而飭見在被兵省分瘡痍未復亟須廉明之吏拯我羣生著各該督撫察看該省緊要缺分及凋敝之區慎簡賢員俾令彈壓撫綏力圖補救如果撫馭有方著有實效卽行奏請給予升銜仍畱本任數年之後政成報最朕必破格施恩超遷不次其餘各直省地方並著各該督撫等隨時體察如有人地相宜不須更調者亦可奏請加銜畱任俾得盡心民事興利除弊日起有功朕將求才於循吏之中備他日封疆重寄其各勉圖報稱以副

朝廷任官惟賢之意將此通諭知之○諭昨有旨令該部酌增河南懷慶及開封許州各學額以示優獎因思上年廣西桂林湖南長沙各省城先後被圍日久均能竭力捍禦轉危爲安該處士民志切同仇深明大義自應一體破格施恩以昭激勸所有廣西桂林湖南長沙府縣學額著該部一併查明酌擬加額名數具奏○壬午諭軍機大臣等前因賊匪竄入垣曲諭令勝保善祿等設法繞出賊前合力夾擊並令各路進剿官兵俱准勝保調遣本日復據郭夢齡奏賊匪於初五日由絳縣竄至曲沃縣地方偏近平陽見在府城內存兵僅二百餘名等語該府爲太原屏障關繫晉省全局賊蹤剽急若令其沿途搶掠裹脅踞險負隅或又築壘掘濠施其故智攻剿更覺費力勝保善祿等分路緊追諒不至稍有遲緩郝光甲見由澤州翻山迎擊不知見抵何處著勝保統籌全局

何路可以設伏何路可以迎擊何處官兵可以就近調撥酌量安速布置務須設法繞出合力夾擊萬不可任賊紛竄致有蔓延前曾諭令托明阿統兵馳往夾攻此時諒亦行抵晉境其應如何扼要堵截之處並著勝保隨時知照此股西竄賊匪人數尙多總以及早撲滅爲要本日據哈芬奏懷慶賊匪該大臣等原擬於七月二十九日卯時出隊進攻該逆已於二十八日全行逃竄二十九日始行知覺俱係已空木城等語著勝保查明據實覆奏將此由六百里加緊各諭令知之○以林揚祖署河南布政使賞牛鑑五品頂帶署河南按察使已革兩江總督○癸未諭內閣山東巡撫李德秉性方剛持躬正直由卽用知縣洊升順天府府尹外任藩司朕御極以來知其辦事認真不避嫌怨擢授巡撫卽欲畀以兼圻重任適值逆氛未靖東省爲畿輔屏蔽藉資保障是以暫緩遷擢嗣因

賊擾河北自請帶兵越境進剿不分畛域忠惻可嘉乃以積勞成疾給假回任調理方冀速痊久承恩眷詎料回任後病勢日增遽聞溘逝軫惜良深李德著追贈總督並加太子少保銜照總督例賜卹任內一切處分悉予開復應得卹典該衙門察例具奏靈柩回籍時由山東藩庫賞給銀五百兩並著沿途地方官妥爲照料伊子拔貢生李啟訥李啟恩伊孫李善初著俟服闋及歲時由該部帶領引見候旨施恩以示朕篤念盡臣之至意尋予祭葬諡恭毅○諭軍機大臣等訥爾經額恩華奏餘匪潰竄入山派兵追剿情形一摺又片稱賊入垣曲添派兵將赴陽城會剿等語勝保此時想已由濟源追賊前進而郝光甲翻山由陽城進剿之兵恐已落後該大臣等先後所派馬步隊各兵見在追至何處是否與勝保等會合晉省存兵甚少惟有嚴飭諸軍迅速追捕毋令待援不

至以致失事恩華見擬移營濟源以爲後路聲援恐賊蹤尙遠仍屬無濟著卽相機前進毋稍延誤晉省爲畿輔屏藩處處壤地毗連關繫甚重若各路追兵及早趕到尙可卽時撲滅爲亡羊補牢之計據奏前派雙成防守西路何以不令郝光甲前往協防哈芬旣以晉省兵單賊數甚多爲詞該大臣等又以西路竄出事後歸咎他人爲解總之賊匪由豫竄入晉境兩省督兵大員均難辭咎若再遷延推諉致令賊匪踞險負隅餘燼復熾咎將誰執朕賞功罰罪一秉至公調度有方固不吝特加懋賞儻玩延貽誤亦豈能不執法從事耶懷之將此由六百里加緊各諭令知之○山東布政使崇恩奏巡撫李德因病出缺並代遞遺摺得旨不料汝志未伸竟至不起朕屢欲授汝總督第因東省緊要故爾遲遲所幸懷慶圍解雖餘賊竄入晉省河北大局稍有頭緒汝竟未及見汝其

有知尙能爲朕憤志殺賊乎此諭李德之旨若該撫靈樞尙未啟程著崇恩另錄一通在靈樞前焚化○以張亮基爲山東巡撫未到任前以山東布政使崇恩暫行署理○實授駱秉章湖南巡撫○甲申諭內閣張芾奏參剿捕土匪失利之道府一摺江西泰和縣土匪滋事經該撫札飭贛南道周玉衡吉安府知府王本梧先後馳往會同剿辦七月初一日該道督帶兵勇馳抵泰和縣城探聞賊聚水南地方該道督兵涉水往剿該匪千餘人逞兇拒敵我兵施放槍礮斃賊一百二十三人奪獲黃旗一面鐵礮五位匪黨乘舟竄逃時該處祠內尙有賊匪屯駐該道用火焚攻兵勇等急於滅賊冒險趕入祠內致有傷亡該府王本梧由省聞警折回督帶兵勇往剿因協同領兵之守備未能趕到該府馳抵倉背嶺地方駐紮亦被賊傷退保郡城周玉衡久任江西捕匪向稱得力此

次失事雖因兵勇貪功所致而文武員弁受傷陣亡究屬咎無可辭王本梧雖經受傷亦屬防剿不力均著革職暫行畱任以觀後效其吉安營守備岳殿卿奉調領兵因何遲延貽誤之處著卽查明具奏見在總兵阿隆阿已帶兵馳往剿辦著卽會同該道府迅將此股土匪殲除淨盡毋稍遲延○諭軍機大臣等本日據郭夢齡奏絳縣已於初五日失守賊匪見擾曲沃逼近平陽太原省城兵力甚單無可調撥請飭各路重兵星速援應等語是晉省曲沃平陽一帶情形萬分喫緊雖勝保等已由濟源追賊前進該大臣已派馬步隊各兵繞道前往但俱係從後尾追不能鈔出賊前仍恐緩不濟急若賊奔竄汾霍之間則太原省城甚屬可慮其東路直接井陘等處乃畿輔最要關隘前有旨令訥爾經額卽派將弁管帶正定防兵星夜啟程由獲鹿山口直抵太原徑趨霍岳卽可

迎頭截擊此舉萬不可緩至正定一帶爲畿疆門戶卽著該大臣酌調他處官兵前往防守如此一轉移間既可速援晉省而正定要隘防堵仍不稍疏前派帶兵之郝光甲等見已行抵何處著卽飛催速剿並將各路追賊接仗情形隨時奏報以慰廑念將此由六百里諭令知之○諭舒興阿奏探聞賊匪西竄撥兵堵剿等語晉省爲京師屏蔽關係甚重該督見將觀音堂駐紮之涼莊滿兵五百名派副都統綿洵統帶於初七日由茅津口渡河前進著卽飛催迅速馳抵勝保軍營以資協剿其孟津渡口仍嚴飭珠克登等實力巡查毋任匪黨偷越至陝州一帶情形喫重該督仍卽暫駐該處相機調度應如何撥兵進剿或必須出境扼截之處均著隨時妥速籌辦仍須與晉省聲勢聯絡不可稍涉疏虞所派總兵桂齡帶兵折回聽候調撥之處卽照所議辦理將此由六百里諭

令知之○諭據江忠源奏請製戰船以清江面一摺賊匪自攻陷金陵揚鎮三城以來擄掠民船數已逾萬我軍攻剿未能得手皆由戰艦無多致令長江天塹無所控扼近又攻撲江西省城分繞瑞州豐城饒州各府縣逆氛猖獗亟宜設法先清江面前有旨令張亮基等購募船礮酌派兵勇順流而下與下游師船兩路夾攻想已遵辦惟江路綿長必須廣爲製造著裕瑞張亮基崇綸駱秉章等於四川湖廣等處仿照廣東挖罟船式速卽雇覓工匠共製戰船百餘隻每船約載兵五十名均著剋期三月一律齊備以資調遣本日已令葉名琛等迅將船隻式樣咨行各該督撫查照辦理並備五百斤三百斤礮位千餘尊應用矣川省應造船隻或在該省或在湖北宜昌一帶製造卽由裕瑞酌量辦理所需經費亦著該督籌款趕辦又據奏四川嘉定府知府俞文詔熟悉工程著

卽飭該員監造總期妥速堅固爲要至此項船隻造成尙需時日
前諭湖北湖南兩省購募船隻仍著張亮基等遵照趕辦儻能與
下游艇船併力肅清江面金陵揚州先經收復所有新造戰船尙
可爲他日江面水師之用原摺著鈔給閱看將此由五百里各諭
令知之○諭前經疊降諭旨令葉名琛等雇備紅單船隻載礮駛
赴江南助勦業已前後開行茲據江忠源奏製造戰船以廣東挖
罟船爲式著葉名琛等速將此號船式咨明各該督撫仿照製造
卽選派熟悉工匠數名令赴兩湖南北俾資製造並著葉名琛等
購備夷礮五百斤三百斤重者合千餘尊剋期三月解至武昌以
便配搭船隻分布水師各營爲水陸夾擊之計又廣西右江道張
敬修籍隸廣東購備礮位雇募水勇均所熟悉著葉名琛飛咨勞
崇光如該員能前往督率辦理當可得力也將此由五百里各諭

合知之○江西巡撫張芾奏逆匪在得勝門外迤西暗挖地道經江忠源派楚勇從內迎掘旬日之內破賊地道三處七月十八日以後湖南候補道夏廷樾統帶鎮筸等營官兵六百名湘勇二千餘名陸續到永和門外紮營湖南訓導江忠淑帶楚勇一千名於章江門外紮營二十三等日復有賊船七十餘隻至河干停泊二十四日我兵分七路進攻總兵音德布統帶滇兵直隸州知州朱孫詒帶領湘勇守備王坤帶領鎮筸等營兵益以川勇貴勇共二千八百名至永和門東北分三路進攻七里街賊營賊眾約三四千人拒敵湖南訓導羅澤南帶湘勇首先迎擊滇兵繼之鏖戰良久斃賊約三百餘名賊眾敗走我兵乘勝追殺直抵賊營賊皆紛紛上船正擬一面焚船一面燬營賊突從左邊山後鈔出二千餘人從旁橫擊羅澤南等拚死拒戰賊復從右邊營後鈔出一千

餘人我兵力不能支干總楊受春等登時陣亡賊眾乘勢撲來經武生楊虎臣帶領湘勇奮力橫截賊前將賊擊退斃賊數十人我兵復追至賊營始行收隊查點滇兵陣亡三十二名湘勇陣亡八十一名此沙港三路進攻情形也廣勇與省局練勇南昌勇由空心礮臺出隊進攻得勝門外賊營賊出數百人拒敵眾勇奮力迎擊賊三進三卻被我兵殺斃數十名各勇亦受傷數名知府耆齡遊擊祥麟於城上督飭弁兵開礮斃賊多名九江等營兵由永和門外湖岸一路進攻楚勇辰州撫州兵由章江門外分兩路進攻賊皆堅伏不出均各撤隊惟滇兵湘勇先後斃賊四百餘名而兵勇陣亡五百餘名之多總兵音德布係統兵大員都司楊煥章係辦理營務自請出城督戰之員雖查無退避情事究未能全師而歸均應請旨暫行革職畱任湖南武生楊虎臣於賊眾追撲時奮

力擊退得以轉敗爲勝應請以把總補用並賞戴藍翎以示鼓勵
陣亡之七品軍功易良幹等均請飭部分別議卹二十六日我兵
復照原路出隊江忠源親身出城督戰察看地勢沮洳路多阻隔
擬令湘勇移營進逼賊壘以便攻擊二十七日湘勇正在紮營賊
眾廣至我軍迎擊賊仍退去各練勇自空心礮臺出隊誘賊頗有
斬獲礮臺開礮斃賊尤多而賊壘甚堅終未能乘勝撲取臣惟有
與陳孚恩江忠源熟商攻剿之策以期剋日殲除至督糧道鄧仁
堃前在南昌府任內籌辦守禦精細周備所練壯勇亦極得力洵
屬謀勇兼全署鹽道王訓駐守得勝門逼近賊營晝夜巡查不遺
餘力兩次地雷轟城均經協同督兵搶護署南昌府知府林福祥
熟悉武備身在行間尤爲奮勇均係守城出力尤著之員查豐城
縣失守鄧仁堃係兼轄道員林福祥係不同城之知府瑞州府失

守王訓係兼轄道員均有應得處分該員等皆在圍城之中勢難兼顧究屬過不掩功且豐城縣瑞州府旋即收復可否懇恩免其置議再饒州府地居下游恐賊竄擾前經臣飭令鄱陽縣知縣沈衍慶帶勇擇要防堵近日湖水驟漲一片汪洋無險可扼府城多年衝塌費鉅未修茲探得賊船數百隻於七月十三日自省分竄饒州鄱陽縣知縣沈衍慶樂平縣知縣李仁元各帶練勇奮力抵禦同時力盡捐軀知府以下各官均無下落除查明沈衍慶等殉難確情奏請賜卹外臣株守省城未能速籌剿賊以致久不解圍俾賊竄擾上下游郡縣相繼失守咎無可辭應請旨併案從重治罪上諭張芾奏江西守城官兵疊次破賊地道並經湘勇楚勇與滇兵楚兵川勇貴勇分路進攻乘勝追殺賊匪復從左右鈔出兵勇支持不住致陣亡百餘名之多幸武生楊虎臣帶領湘勇橫

截賊前得以轉敗爲勝其餘各路先後出隊誘戰均未得手是南昌城外賊眾尙多並無潰散之勢該省拒守兩月有餘而饒州瑞州又疊次失事吉安贛州一帶土匪復肆行滋擾著張芾與陳孚恩江忠源督率在事文武員弁迅籌堵剿毋稍疏懈另片奏七月十三日饒州失守該府以下各官均無下等語著卽查明具奏其鄱陽縣知縣沈衍慶樂平縣知縣李仁元力盡捐軀著與被戕之萬安縣典史及被匪殺斃之縣署眷屬均卽查明奏請議卹署高安縣知縣下落著一併查明具奏該撫自請從重治罪之處著暫行存記其保奏守城出力之糧道鄧仁堃知府林福祥署鹽道王訓雖有微勞惟於所轄府縣均有失事該員等未便卽行免議著一併存記均俟軍務告竣再降諭旨見在吉安府城被匪攻撲總兵阿隆阿帶兵六百名前往剿捕兵力尙單該撫已派令湖南

道員夏廷樾知州朱孫貽等帶領楚勇湘勇前往援應著卽督飭該員等合力攻剿迅速撲滅江忠源奏請製造戰船購備礮位一摺本日已分別諭知四川兩湖廣東各督撫辦理其保奏各員除已革同知勞光泰毋庸派辦外知府俞文詔道員張敬修已諭令裕瑞葉名琛飭知該員等一體遵照其夏廷樾林福祥二員見在江西應於何時飭往何處監督船工購礮募勇之處著張芾江忠源酌量妥辦將此由六百里加緊諭知張芾並傳諭陳孚恩江忠源知之○以江西豐城縣被賊竄陷知縣陳繼恩革職逮問並革知府盧琳都司高彬職均暫畱任○予江西陣亡縣丞汪普慶等祭葬世職○乙酉諭軍機大臣等陸應穀奏派兵嚴防河岸情形一摺逆匪由懷慶竄入晉境沿河一帶地方自應嚴密防範所有汜水等處各渡口該撫已添派兵勇防守並著嚴飭各地方文武

晝夜巡查無任偷渡豫省見獲奸細訊有賊欲分股前來汴梁之說雖不必遽信爲真亦不可不豫爲防備該撫見擬折回省城務當鎮定人心無令驚惶遷徙歸德擒匪自徐廣緒到後漸次解散該撫見派都司常啟雲帶領壯勇前往隨同徐廣緒搜捕不難一律肅清王家琳等所帶各兵准其裁汰疲弱選擇精銳千名派往永城駐紮以堵賊匪北竄之路該撫仍當隨時密加偵探何路緊急卽應親往督辦切勿株守省垣致誤事機經文岱本交訥爾經額差遣委用今已剿匪回省著卽飭令該總兵前赴訥爾經額營聽候差委可也將此由五百里諭令知之○諭前因江北防守緊要疊經降旨諭令慧成折回清江與琦善咨商扼要設防茲據慧成奏據琦善咨稱東路添兵尙可從緩皖省情形喫緊擬親自督兵前往和州一帶相機迎剿等語賊匪竄至廬州運漕鎮並有

賊船欲由巢湖等處攻撲廬州皖省兵單不可不嚴加防堵慧成著卽帶兵馳赴和州一帶會同李嘉端迅籌進剿以遏賊北竄之路其揚州東北一帶疊據雷以誠福濟以勇多兵少爲慮奏請添兵亦係實在情形著琦善統籌全局於奕經容照所帶官兵內酌量調撥前往協剿毋令賊匪乘虛竄逸將此由五百里各諭令知之○命左都御史朱鳳標侍郎恆春赴山西查辦河東鹽務○以山西垣曲縣城被賊竄陷革巡撫哈芬職仍畱任○丙戌諭內閣京師自七月以來雨水過多雖連日天氣晴明而秋收未免歉薄糧價稍昂貧民度日維艱向例京師每年十月初一日開設飯廠著加恩先期於九月初一日各該城照舊設廠煮飯散放俾資接濟○諭軍機大臣等本日據郭夢齡奏曲沃失守賊匪於初十日已刻已在平陽府東西南三門放火攻城各路援兵尙未趕到請

於附近防兵飭調二三千名星夜來晉等語覽奏實深焦灼平陽爲太原南路保障若有疏虞不但太原等處被其滋擾卽畿輔亦恐震動著訥爾經額遵照前旨卽撥正定官兵數千名星速入山赴援並著揀派曾經行陣得力將弁管帶前進直趨太原以南至澤州靈石韓侯嶺一帶險要地方駐紮堵賊北竄太原之路並可沿途偵探賊蹤迎頭截擊其獲鹿井陘一帶爲山西直隸交界要路山徑險峻著卽調撥重兵移遠就近扼要防守見在懷慶附近地方仍應嚴密扼守其臨洛關等處防兵及盛京吉林各兵均可酌量移撥正定一帶以資守禦晉省賊匪一日不除近畿各處一日不能安堵訥爾經額身爲統帥責無旁貸畛域之見不可稍存尤不可以殘賊視之率曰不至於夫不至於一語誤人甚多尤可笑彼昏愚者至不可爲猶曰斷不至於卿其戒之將此由六百里

加緊諭令知之○諭本日據郭夢齡奏曲沃失守賊圍平陽一摺
覽奏曷勝焦急前因賊竄山西勝保等跟蹤追擊諭令迅速剿滅
見在平陽府城被圍守兵僅二百餘名極爲單弱總兵烏勒欣泰
自澤州攔車鎮前赴平陽至今未到哈芬帶兵無多赴援亦甚迂
緩恐係聞賊勢剽急遷延不進若平陽稍有疏失關係非輕且平
陽迤北霍州韓侯嶺一帶險隘見俱無兵扼守踰嶺而北則太原
省城正當其衝若任賊突過霍州由太原直下井陘踞險內竄勢
將何所底止賊匪冒險深入利在速奔乘我不備勝保善祿西凌
阿等務須帶兵疾馳使賊無暇喘息勦辦方可得手訥爾經額所
派各路援兵並著飛催前進尤須設法繞出賊前此係最要機關
不可稍緩澤潞山徑可通太原之路勝保等諒已探明卽派奇兵
繞道開出扼定霍嶺前後夾擊此股逃匪當不難迅速殄滅也前

有旨各路進剿官兵均准勝保調遣務當統籌全局相機督剿如
有不遵調遣畏葸貽誤者卽著嚴參以軍法懲辦並將剿賊情形
隨時奏報以慰廑念將此由六百里加緊諭令知之○以海運事
竣賞孫瑞珍慶祺花翎○丁亥命前任湖南布政使潘鐸馳赴山
西省城會辦防剿事宜○戊子諭內閣前因賊擾懷慶密邇山西
疊次諭令哈芬嚴密防堵該撫前奏布置隘口情形據稱已屬周
密乃賊匪突陷垣曲擾及絳縣曲沃直撲平陽疊據藩司郭夢齡
馳奏而哈芬近在省南奏報轉遲且由陽城親帶官兵進剿自應
迅赴平陽迎擊何以遷延旬日至今尙逗遛潞郡本日始據奏到
絳縣曲沃失守於賊擾平陽府城情形茫無聞知該撫統轄全省
不知所司何事卽如同知魯鴻疇稟探垣曲賊情郭夢齡據以入
告哈芬並未接閱是文員之不遵調度可知烏勒欣泰係本省總

兵例歸巡撫節制何至屢催罔應尙須請旨飛調是武職之不遵調度可知至請以所帶兵百名守護入京要隘等語直是束手無策似此調度乖方畏葸無能若仍令待罪封疆必致更滋貽誤哈芬著卽革職拏問由郭夢齡派員解京交刑部按律治罪河東道張錫蕃垣曲縣知縣晏宗望監掣同知魯鴻疇署參將王恆著與絳縣知縣潘名魁曲沃縣知縣丁璜一併革職拏問交郭夢齡嚴行審訊如係避賊先逃棄城不守卽於訊明後奏請按律正法以肅軍令見在進剿之各路官兵前已有旨俱准勝保調度著卽申明紀律嚴定賞罰迅掃賊氛以副委任○諭前以賊竄豫省大兵會剿特命訥爾經額爲欽差大臣各路官兵統歸節制迨賊圍懷慶朕以該郡與晉省接壤屢經降旨令該大臣派兵分路嚴防杜其西竄諄諄訓示至再至三訥爾經額身爲統帥自應通籌全局

嚴密堵截乃懷慶之圍甫解而賊匪竟由西路竄入晉境由垣曲絳縣曲沃擾及平陽雖經勝保等跟蹤追剿訥爾經額派撥官兵先後援應而該大臣調度布置未能周密實難辭咎見已將山西巡撫哈芬革職拏問治罪訥爾經額著卽褫去黃馬褂以示薄懲仍著懷遵前旨嚴飭援兵迅速前進並飭繞出賊前扼要攻截痛加剿洗務將賊匪殲滅無遺儻再延緩致令紛竄滋蔓惟該大臣是問恐不能當此重咎也○諭軍機大臣等逆匪由懷慶竄入山西境內連陷城邑近偏平陽已明降諭旨將哈芬革職拏問解京治罪並命郭夢齡署理山西巡撫矣郭夢齡前奏省城防守事宜已嚴飭文武官紳趕緊布置此時當已周妥賊攻平陽又已數日見在守禦情形何如澤潞進追之兵業經遲誤其勝保等兩路由風門山入口一由濟源縣沿河追剿均係緊躡賊蹤此時是否

已抵平陽日內未見奏報或因南路梗阻卽速探明具奏以慰廛
念平陽迤北一路平衍除韓侯嶺外別無可扼之險省城存兵誠
無可掇他處有無可以移緩就急之處卽著迅籌緩急調往堵截
並飭所派委員曉諭該處紳民集勇嚴扼萬不可任賊稍有竄越
前諭訥爾經額派撥正定官兵由獲鹿井陘入山赴援著卽飛催
前進儻能趕到霍嶺扼要夾擊剿辦當可得力山西巡撫兼任提
督通省營伍皆歸節制應如何布置卽著嚴催迅撥如查有不遵
調遣畏葸避賊及地方官吏聞警先逃者均著按律以軍法從事
不可稍事姑息其郝光甲烏勒欣泰之兵亦卽加緊催督以爲夾
擊之計不可聽其沿途逗遛又蹈哈芬故轍本日又有人奏介休
縣之烏鼠谷交城縣之葫蘆峪均爲逋藪大原縣山中多產硫磺
亟須嚴密防範亦著該署撫一體訪緝認真查察毋得稍有疏懈

將此由六百里加緊諭令知之○諭據德勒克多爾濟等奏俄羅斯固畢爾那托爾咨稱果爾畢齊河地界並未立有界牌以及近海一帶呈請定立界限一摺俄羅斯近海一帶地方有無設立界牌之處理藩院定例並未詳載著英隆先行查明該果爾畢齊河東山之南北兩處從前如何分定界限以及伊等近海一帶地方究係應否設立界牌之處著卽行文知照德勒克多爾濟等循照舊例妥爲辦理具奏俄羅斯原文著卽鈔給閱看將此諭令知之○諭適閱德勒克多爾濟等奏俄羅斯固畢爾那托爾咨稱果爾畢齊河地界並未立有界牌其近海一帶地方請立定界限一摺當寄諭黑龍江將軍英隆令其就近查明矣惟此事乃我國與俄羅斯國疆界所繫甚重著德濟訥勒亨額體察該果爾畢齊河東山南北兩界究係有無界牌以及近海一帶地方應否立界之處

體察情形照舊辦理著俟英隆行文庫倫時詳細查明辦理具奏

俄羅斯原文著一併鈔給閱看將此諭令知之○以恆春爲山西

巡撫

由刑部左侍郎遷

未到任前以布政使郭夢齡署理○以山西太原

府知府吉祥暫署布政使○以山西勦賊帶兵耽延革總兵官烏

勒欣泰職仍畱任○己丑諭內閣前經降旨令各直省督撫率同

紳民等認真團練保衛鄉閭並刊刻嘉慶年間明亮德楞額築堡

禦賊疏龔景瀚堅壁清野議頒發各省諒已實力奉行茲據光祿

寺卿宋晉呈進鄉守輯要合鈔一書朕詳加披閱於團練事宜頗

爲詳備並著一律交武英殿刊刻進呈候旨頒發○諭戶部奏准

兩鹽務緊要請飭江督責成運司妥辦一摺淮南引鹽因道路梗

塞未能銷運而產鹽各場尙屬完善若任聽私煎私售致自然之

利棄之如遺於鹺綱全局大有關係著兩江總督飭令運司移駐

通泰適中之地督同運判場員就場徵課卽照戶部所議章程變通酌辦期於課項實有裨益見在運司庚長尙未到任卽責成署運司郭沛霖悉心經畫將來庚長到任後仍著郭沛霖幫同辦理以資熟手○諭戶部奏關稅情形請照常辦理以裕課稅而杜弊端等語各關課稅向例俱按正額盈餘額定銀數徵收自本年二月逆匪竄擾江南潁墅淮安九江蕪湖鳳陽等關紛紛奏請儘徵儘解繼而崇文門臨清關亦援案奏請業經降旨允准惟各關距賊氛遠近不一情形亦各不同若概以儘徵儘解爲詞漫無限制必致任意侵虧弊端百出著照部議嗣後各關均宜設法整頓仍遵額定稅數照常徵收不准以儘徵儘解違例奏請致滋流弊如將來虧短實屬有因著俟一年期滿奏報到時由戶部酌量情形分別奏明請旨覈辦○諭軍機大臣等琦善等奏連日圍攻情形

一摺逆匪久困揚城屢次縋城思竄均經該處兵勇分路截擊殲斃不少其通船各水路均已沈石釘椿陸路各要口亦均嚴密堵禦復嚴禁粒米入城斷其接濟外援既絕自有坐困之勢惟賊勢愈窮愈圖竄逸一旦潰圍而出分擾他處又成蔓延之勢不可不嚴加防範該大臣等務當分飭官兵各路守禦勿墮奸計其金陵鎮江賊船尤須嚴防竄入琦善陳金綬雷以誠福濟雖分路駐紮實共辦一事琦善身爲統帥更屬責無旁貸趁此賊勢窮蹙同心合力迅圖克復久困之賊不難聚而殲旃也將此由六百里諭令知之○諭駱秉章奏請調廣東挖罟等船駛赴金陵以資堵剿一摺據稱挖罟快蟹等船可由廣東陡河入江前赴金陵等語此項船隻既可由內河駛達江南自無須遠涉大洋轉稽時日著葉名琛柏貴迅速雇備挖罟船百隻快蟹船數十隻選派得力將弁配

帶礮位火器駛駕入江與前赴江南之紅單船及各師船會合夾擊以期迅掃賊氛所有應需經費該督等卽設法妥速籌辦毋稍延誤原摺著鈔給閱看將此由六百里諭令知之○以承芳爲刑部左侍郎

由烏嚙木齊領隊大臣遷

○庚寅諭內閣理藩院奏章嘉呼圖克圖

呼畢勒罕之父端嚙布呈請情願報捐馬五百匹轉爲請旨一摺該呼圖克圖呼畢勒罕之父端嚙布因勦辦逆賊未竣呈請情願報捐驕馬五百匹實出誠悃朕深嘉焉惟軍營應需馬匹見已備妥尙屬足用章嘉呼圖克圖呼畢勒罕見在年幼且供用較多若收此項馬匹朕心深爲不忍著毋庸賞收仍加恩賞給端嚙布大段二匹呼畢勒罕哈達一方著西甯辦事大臣轉交伊徒俟該呼圖呼畢勒罕坐牀時再行賞給○諭勝保奏追勦逆賊沿途斬獲一摺據稱初三日督兵至封門山口從關門兩旁分鈔而上賊眾

棄關逃走經勝保會合善祿西凌阿跟蹤追趕殺賊數百名初十日申刻賊竄平陽府城經西凌阿等奮力斬殺三百餘名追殺十餘里殲斃坐轎頭目僞丞相及僞將軍等復被我兵衝截兩段分竄洪洞平陽勝保飭令郝光甲托雲保等分帶馬步各隊堵剿平陽城內賊匪並會同善祿馳抵洪洞繞出賊前與西凌阿馬隊兩路夾擊斃賊五六十名又片奏郝光甲移營平陽北門外逆匪突出二三千名拌死撲入三次皆被我兵殺退各等語逆匪自竄擾垣曲晝夜狂奔因前路無兵兜剿以致平陽府城倉卒失事擾及洪洞見在勝保已繞出賊前扼要駐紮托明阿恩華等帶領大兵計日亦可趕到著卽督飭各路弁兵合力夾擊毋稍延誤其殲斃坐轎之賊是否逆首著卽查明具奏曲沃縣知縣及幕友等殉難情節著查明請卹其失守城池文武各員並著確查嚴參懲辦至

所請殺賊出力各員并量予鼓勵之處著准其據實保奏候朕施恩○諭勝保奏查明道員知縣被賊戕害並請將督兵不力之都司從重治罪等語山西河東道張錫蕃帶兵在垣曲防剿被賊戕害垣曲縣知縣晏宗望因防兵潰散卒不及備身受七傷殞命深堪憫惻張錫蕃晏宗望均著開復革職處分交部照例議卹其已革都司王恆署都司景亮帶領大同鎮兵在垣曲防守賊至不敢接仗先自潰逃以致縣城失守逆燄鴟張實堪痛恨景亮著一併革職卽著勝保查明王恆景亮避匿何處派員拏解到營卽於軍前正法以爲臨陣退縮者戒○諭軍機大臣等本日據勝保馳奏逆匪初十日竄入平陽府城失守官兵跟蹤追剿斬獲甚多該逆復竄至洪洞被我兵衝作兩段勢甚窮蹙沿途拏獲長髮賊據供該逆欲由山西直犯京師勝保等令郝光甲與托雲保等堵剿平

陽城內之賊復令西凌阿魁福等在洪洞縣北關大路闌截勝保等督兵從東面兩路夾擊斬擒甚眾今勝保已至趙城繞出賊前將該逆全行兜住惟所帶兵勇尙恐不敷分撥仍應添兵扼守前路茲據訥爾經額奏已派副將孔廣順帶兵由澤州一路前進所有前調山西兵三千名亦已飭令由獲鹿井陘一帶回省又據托明阿奏遵旨帶兵赴援已令其迅速前進並令恩華帶兵前往與勝保會合攻剿矣至直隸與山西交界地方除固關正定等處該大臣已撥兵駐守外其餘大小隘口均著嚴飭地方文武加意巡防杜賊奔竄將此由六百里諭令知之○諭勝保奏逆匪竄擾平陽洪洞督兵繞出賊前各一摺覽奏焦急之至逆匪西竄晉省該處防兵望風先潰以致後路追剿之兵不能得手殊堪痛恨現在勝保帶兵備涉艱苦已經繞出賊前賊勢既分攻剿較易前有旨

令各路官兵統歸勝保調遣著卽相度機宜設法進剿並嚴飭各路帶兵將官四面兜圍防其奔竄本日據哈芬奏令遊擊和昌帶兵八百名駐紮韓侯嶺一帶著卽催提前進扼要堵截恩華托明阿所帶之兵計日亦可趕到均著勝保咨商妥爲布置趙城霍州等處竟有餽賊竄馬豫備糧石之事該處素有習教之人難保不密爲勾結勝保駐紮該處務須加意慎重嚴密調度勿露風聲並曉諭紳耆自相保衛固結人心勿爲賊誘至軍餉一節本日已諭令郭夢齡迅卽撥銀二萬兩解赴大營如一時不能解到所有各州縣倉庫錢糧均准隨時動用再晉省素稱富庶急公報效者諒不乏人著卽徧爲曉諭如有紳民人等情殷助餉或資送米食接濟軍營者均著勝保隨時獎賞保奏將此由六百里加緊諭令知之○諭托明阿奏統兵馳赴晉省會剿一摺前據恩華奏稱初九

日移營濟源當令其不可株守一縣遵旨前進諒已星速跟追該將軍於十四日始行裹糧進山由澤州小路偵探賊蹤迎頭截擊已屬落後本日據勝保馳奏平陽府城初十日失守我兵跟蹤追剿賊復竄擾洪洞見已將該逆衝作兩段勝保等已繞出賊前遏其北竄惟所帶馬步各隊官兵僅止四千餘名各處隘口不敷分撥北路韓侯嶺最爲扼要之區必須添兵駐守防其奔竄托明阿著卽由陽城一路前進無分星夜馳赴韓侯嶺一帶扼要迎擊斷不可稍有遲延恩華著卽由垣曲一路進兵飛催遄行直赴平陽洪洞合力攻剿所有赴晉各路官兵並山西省官兵已有旨均歸勝保調度該尙書將軍等務須和衷共濟趁此賊匪喘息未定之時一鼓殲除不畱餘孽萬勿再令紛竄將此由六百里加緊各諭令知之○諭前據慧成奏皖省情形喫緊必須親自帶兵前赴和

州一帶迎勦當諭令督兵馳往會籌勦辦茲據雷以誠福濟奏請
畱慧成等駐兵揚州會同攻勦等語揚州東路兵力較單固須添
兵協助惟皖省賊蹤肆擾亦在防勦喫緊之際著琦善慧成酌量
情形如揚州東路喫緊應畱慧成督兵防勦所有皖省和州一帶
應撥何項官兵前往會勦抑或慧成仍赴安徽由琦善另撥兵勇
協防揚州東路總當統籌全局毋得顧此失彼將此由六百里諭
令知之○予福建陣亡知縣王廷幹祭葬世職○辛卯諭內閣毓
書奏外藩蒙古人等沾染漢人習氣漸失根本請旨嚴行禁止一
摺蒙古地方素性淳樸不事浮飾近來蒙古人取用漢名又學習
漢字文藝殊失舊制茲據毓書奏稱蒙古人詞訟亦用漢字更屬
非是若不嚴行禁止斷然不可著理藩院通行曉諭內外各札薩
克部落嗣後凡蒙古人務當學習蒙文不可任令學習漢字以副

朕敦厚蒙古淳僕風俗之至意○諭前據王懿德奏福建海澄同安廈門安溪等廳縣會匪滋擾戕官劫犯失守城池自請治罪有旨令查明失事情節具奏後再降諭旨嗣據該署督先後奏報所有失事地方均經次第收復惟廈門尙在攻剿該署督未能先事豫防咎有應得王懿德著交部照例議處尋部議降二級畱任從之○諭王懿德奏請將浮開鄉勇名數之知縣革職嚴辦一摺福建同安縣知縣李湘洲先因該處會匪攻城不能固守致有失事迨收復後稟報所雇鄉勇自一二千名遂增至八千餘名其爲虛報冒銷情弊顯然該員失守城池本有應得之罪茲復於雇勇任意浮冒更屬貪污李湘洲著革職拏問交有鳳王懿德查明冒濫情節追賠嚴辦○諭黃宗漢奏温州府屬被水情形見飭撫恤查辦一摺前以浙江台州府城猝被水災降旨令該撫導派道府大

員前往撫恤並查明被淹田畝分別蠲緩具奏茲復據該撫奏稱
温州府地方於六月十八日起狂風大雨歷八晝夜之久山水漲
發江湖泛溢入城低窪田廬及城廂內外鋪戶均遭淹浸小民謀
食維艱見經該道府飭縣勸捐錢米設局散放並請於溫處二府
屬借撥常平倉穀以資接濟著該撫卽飭查明迅速覈辦其應如
何分別蠲緩之處著與被水之德清等二十三廳縣一併詳查據
實具奏○諭軍機大臣等王懿德奏請飭已革臬司張熙宇迅赴
閩省等語前有旨令張熙宇赴閩差委嗣經李嘉端等以皖省緊
要奏請將該革員暫畱效力業已降旨允行此時安徽和州巢縣
一帶時有賊匪竄擾張熙宇勦辦尙屬得力著仍畱安徽俟該省
防剿事竣再行飭赴福建又昨據該撫奏廣東紅單船行抵閩洋
見令協同水師攻剿廈門賊匪此項船隻專爲江南勦賊遠道調

來冀其迅速趕到肅清江面見在金陵揚州鎮江尙未克復匪船
南北竄駛肆行無忌較之廈門洋面情形更爲緊要所有此項紅
單船隻著卽飭令迅赴江南會剿毋庸再畱閩洋至所帶軍裝礮
械鉛藥均由廣東備辦齊全見旣在閩剿匪不免動缺所帶盤費
亦恐不敷著該撫一併照數配足毋任短絀以利遄行並著知照
浙江江蘇各海口一體催趲入江將此由五百里諭令知之○署
山西巡撫郭夢齡奏賊陷平陽撫臣失機恐致激成事端得旨覽
奏各情實係該革員荒謬已極不料哈芬孤恩喪良若是見雖逮
問於事無補朕無知人之明咎將誰諉朕若有傳哈芬密旨亦不
應向人道及況本無此密旨伊所行若是意欲何爲○前任鴻臚
寺卿賈克愼等奏參巡撫棄軍逃避紳民憤激恐釀變故請降旨
安民得旨可笑之至亦哈芬自貽之戚可惡已極○壬辰諭內閣

穆騰額等代奏達賴喇嘛因賊匪擾害數省軍民不能安生情願
各率呼圖克圖喇嘛等禱經祈禱俾賊及早殲除迅奏膚功實出
伊等誠悃朕甚嘉之加恩著賞給達賴喇嘛哈達一方捻珠一串
著交駐藏大臣轉賞達賴喇嘛○諭札薩克喇嘛朗結曲丕爲人
老成經理通達平日徒眾傾服見在班禪額爾德泥涅槃其呼畢
勒罕降凡後所有後藏徒眾皆交該喇嘛管束加恩著賞加朗結
曲丕色勒本諾們罕名號一切應辦印信敕書等項著交理藩院
查例議奏給予○諭軍機大臣等據郭夢齡及賈克慎等參奏哈
芬謬妄情形各摺片前已有旨將哈芬革職拏問交部治罪矣郭
夢齡等奏哈芬所稱奉有密旨出示借銀一節前據戶部奏請勸
捐山陝等省尙稱完善曾有旨諭令哈芬郭夢齡酌量情形或捐
或借飭將諭旨刊刻宣示並非朕另有密旨也哈芬措詞失當又

不知緩急直至賊氛逼近始行出示並令將捐項解赴行轅以致民情驚擾種種荒謬大負委任郭夢齡見署巡撫著卽督飭地方文武實力防剿曉諭紳民力行團練互相保衛值此賊匪竄擾之時總以鎮定人心爲要其靈石縣設立糧臺務須妥爲保護源源接濟不可使進剿之兵餉精缺乏仍嚴飭遊擊和昌帶兵駐紮韓侯嶺扼守要隘儻聞警惶懼稍有退縮致令竄匪突越軍法具在決不姑寬昨據訥爾經額奏撥回大同鎮兵二千七百名此時省城兵力固單而迎剿尤爲緊要本日已諭勝保酌量調遣省南賊匪剿盡太原自可無虞其省北石嶺關地方見在兵力實難顧及然賊蹤飄忽忻代大同一路界連直隸宣化亦不可不早爲之備前調之大同鎮兵一千名此時是否趕到著卽酌量布置以固後路藩籬並著將山西省輿地繪圖貼說呈覽其與直隸交界各隘

口尤須詳晰註明道里遠近勿稍遺漏將此由六百里加緊諭令知之○癸巳諭內閣自逆賊竄擾懷慶勝保與托明阿善祿等偪近賊巢戰功屢著迨懷慶解圍餘匪西竄勝保與善祿西凌阿等跟蹤追剿行走迅速獨能繞出賊前杜賊北竄見在平陽府業已收復賊匪由洪洞東竄勝保等統帶馬步各隊扼要迎剿所有各路進剿官兵前已有旨均歸勝保調遣茲據訥爾經額奏請馳回正定一帶嚴防各路要隘與晉省相距較遠一切調度勢難兼顧著卽授勝保爲欽差大臣並著訥爾經額派員將欽差大臣關防齎送山西軍營交勝保祇領所有各路官兵及地方文武統歸節制著卽嚴催追剿各兵迅速接應毋稍延緩如有不遵調遣畏葸貽誤者卽行嚴參按律治罪恩華托明阿仍著幫辦軍務與勝保同心協力嚴飭各路帶兵員弁四面兜剿將奔竄賊匪剋期殄滅

朕必加以懋賞直隸與山西毗連各隘口卽著訥爾經額督飭地方文武派委得力將弁嚴密防守偵察奸匪毋有疏虞懷慶一帶卽責成河北鎮道督率地方文武與紳民練勇合力嚴防並著陸應穀察看情形擇要駐紮隨時調度其河岸南北渡口仍著王履謙長臻實力巡查陝西交界各要隘著舒興阿桂明等嚴密布置勿令餘匪偷渡該大臣等其各懷遵朕命毋負委任○諭張亮基崇綸奏遵查遇賊先退之員弁請分別嚴辦等語河南賊匪回竄湖北麻城縣宋埠鎮地方經該督等派兵分路進剿都司善保臨陣退縮首先逃避幾至兵眾大潰實堪痛恨著卽行正法以肅軍令○諭軍機大臣等光祿寺卿宋晉奏請嚴斷濱江接濟一摺據稱上游聚糧之地首在廬州府屬之三河運漕兩處其次則太平府屬之官圩甯國府屬之灣沚鎮又次則安慶府屬之中央鎮

皆係聚米之地欲斷三河運漕之路必扼裕溪荻港兩口欲斷官圩灣汴之路必扼采石蕪湖兩口欲斷中央鎮之路必扼土橋口如能處處周防斷其搶掠則三城之賊不攻自潰又稱沿江一帶商舶漁船可設法招致選派得力兵勇帶領藏伏要口迎擊橫衝各等語剿賊之方以嚴斷賊糧爲第一要著見在百穀登場濱江產糧處所囤積必多著琦善向榮陳金綬雷以誠許乃釗李嘉端等體察情形簡派舟師及團練兵勇分赴各要口堵截斷賊接濟之路並嚴查商販米船毋許偷漏至招致沿江商舶漁船是否可以得力一併查明妥速籌辦將此由五百里各諭令知之○勝保奏逆匪屢由平陽遁出欲與洪洞之賊合股經我兵擊退斬獲甚多乃該逆於十六日由平陽東門突出繞道東北乘夜飛行竄至洪洞東門外經臣派駐洪洞南門截剿之黑龍江馬隊及天津正

定兵丁前往迎擊殺斃長髮賊百餘名生擒十餘名餘賊奔入洪洞南門追趕不及臣當令郝光甲派兵入平陽府城安撫一面飛調平陽圍剿之兵前來洪洞會剿查洪洞迤北可由霍州靈石直入太原西可由蒲縣達汾州東可由岳陽赴潞安一帶道路紛歧見在臣所統兵不敷分布幸已扼住兇鋒暫容布置如各路兵齊在洪洞合圍可期殲滅淨盡但恐稍延時日仍不免有他竄之虞查總兵董占元經臣豫派帶兵在平陽南門外防剿屢次迎提總未見到副都統托雲保帶領馬隊在平陽迤東紮營賊匪乘夜竄出不知追擊復以兵力單弱難以闌阻爲詞總兵烏勒欣泰所帶之兵已到平陽數日該總兵尙在澤州逗遛應請旨將托雲保董占元烏勒欣泰先行革職責令帶罪圖功以觀後效見在賊氛剽急不可不統爲籌畫已飛致恩華等催兵由潞安一帶前來會剿

並與善祿西凌阿等面商分派吉林黑龍江馬隊涼州山西步隊官兵駐紮趙城縣鎮定民心防護城池仍飛飭各路官兵迅速到齊不使逆匪他竄又奏前因北路喫緊將各路兵丁分布北東西三面扼守查東南曲亭一路亦關緊要已派郝光甲駐紮並因托雲保馬隊來遲聞其已到曲亭卽令在彼扼要迎截十七日夜聞賊由洪洞南門全股突出郝光甲弁兵抵禦不住賊已衝過營盤向東飛奔托雲保驟不及防亦被衝營而過臣當卽商令西凌阿魁福等帶領黑龍江西安馬隊六百餘名跟蹤追擊查曲亭鎮東可由浮山岳陽竄潞安府曲亭鎮北可由山徑入沁源竄太谷徐溝直達太原臣與善祿會商逃逆狂奔步隊尾追不及總以扼賊北竄爲要卽日督率各路步隊由趙城霍州至韓侯嶺總期繞出賊前保護太原扼要迎擊如賊竄潞安臣等卽由韓侯嶺取道沁

源轉折而南直擣潞安北路截勦一面飛催清化續撥官兵由澤州徑赴潞安勦辦並咨請嚴防獲鹿遼州及澤州各口免其東竄磁州回竄懷慶頃接訥爾經額來咨以赴晉追勦之兵先後已有一萬四千名之多而覈計臣與善祿西凌阿等所帶馬步各隊僅四千餘名郝光甲帶兵一千五百名至董占元所帶八百名見未趕到此外七八千名係由何路前來尙未得有確信應請旨飭催卽令由潞安東南一帶迅速迎擊不可再有延緩以便臣等由北路繞道馳往合剿上諭見在賊由洪洞突出東奔我兵未能抵禦卽派西凌阿魁福等帶領馬隊六百餘名跟蹤追勦兵力未免單弱見已諭訥爾經額飭令恩華統兵迅速前進與勝保會合兜剿毋庸暫留懷慶托明阿帶兵由澤州過山此時計當趕到著卽飛催應由何路接應妥速布置賊勢剽急異常軍情隨時變幻該

大臣務卽督飭諸軍相機進剿如有畏葸不前貽誤軍務者卽行嚴參按律懲辦朕以勝保臨陣奮勇爭先戰功屢著是以特授爲欽差大臣俾事權歸一該大臣其嚴明賞罰以振軍威埽除餘逆用副委任勉之慎之訥爾經額所稱山西追剿之兵數已逾萬見在未到之兵著卽查明嚴催前進毋再遲延將此由六百里加緊諭令知之○諭前因穎屬捻匪滋擾當諭令周天爵李嘉端相機剿辦經該侍郎等派委壽春鎮總兵玉山並附近各府州縣地方官及委員張清元等分路兜剿數月以來斬獲甚多惟此種匪徒聚散無常苟非大股殲除難免餘黨肆擾見在賊蹤逼近廬州情形最爲喫緊恐穎匪暗中勾結其害更不可勝言著周天爵卽帶兵勇親赴穎州駐紮督飭剿辦其固鎮之兵仍著該侍郎派委得力人員管帶以資防守將此由六百里諭令知之○諭據哈芬奏

與藩臬兩司因批駁案件不能和衷紳士復因團練經費以致不和藩司郭夢齡設立糧臺遲緩太原同知沈巢生因撤出軍需總局挑播藩司愆憑紳士布散謠言各情哈芬見已革職拏問所奏情節是否確實著恆春於到任後詳細訪查沈巢生在軍需局有無弊端因何撤出程震佑係應行發遣之員何以在省逗遛該藩司等有無徇情之處一併據實具奏原片著鈔給閱看將此諭令知之○甲午諭軍機大臣等前因江忠源奏請製戰船以清江面當卽諭令四川總督裕瑞並湖廣各督撫仿照廣東挖罟船式製造百餘隻以資調遣昨據張亮基等奏見已估買江船五十隻改造戰船駱秉章亦飭屬買鈞鉤等船五十隻運赴湖北一律改造另備中船小船募勇鑄礮並請借撥四川銀十萬兩協助經費等語此項船隻已由楚省製備川省毋庸製造惟所需經費較多著

裕瑞卽設法籌撥銀十萬兩趕緊解赴湖北以濟要需毋稍延緩將此由五百里諭令知之○以玉明爲工部右侍郎

由副都統遷

○乙

未諭內閣黃宗漢奏剿辦新城縣抗糧拒捕匪徒一摺浙江新城縣屬南新莊匪徒僧慧心等因欠完錢糧裹脅鄉民抗不交納署知縣宣汝珍親往查拏復敢糾聚數百人持械迎拒將該署縣並親丁等毆斃實屬罪大惡極經該撫派令署湖州府知府王有齡等統帶兵勇馳往圍捕並派署紹興協副將王邦慶等分投阻截諭令紳耆解散脅從該鄉民等均知感憤卽行捆獲駱潮應高大妹洪生澱徐倌春徐景岳德培等六犯僧慧心及陳幅惺二犯亦自行赴縣投首地方見已靜謐著卽將首要各犯嚴行審訊按律懲治並飭委員等督率紳耆查拏餘匪一併懲辦以儆兇頑黃宗漢未能先事豫防著交部照例議處署新城縣知縣宣汝珍據該

撫奏稱該員官聲素好茲因拏辦抗糧匪徒致被戕害情殊可憫
宣汝珍著照陣亡例議卹○諭軍機大臣等前據怡良奏嘉定縣
匪徒滋事該督親赴蘇州督辦本日又據奏稱上海縣閩廣匪徒
聚眾戕官巡道不知下落等語上海華夷雜處又爲海運總匯之
地較之嘉定尤爲緊要該匪倉卒滋事何以署知縣卽至被戕上
海道吳健彰見在何處該匪曾否踞城究竟因何起釁著該督迅
速查明具奏向榮軍營已派兵勇前往黃宗漢復派兵勇協剿該
督卽當督飭文武迅籌撲滅萬不可稍延時日儻能曉諭解散卽
將首犯拏獲不至重勞兵力尤爲妥善所稱閩廣匪徒是否在上
海貿易抑係突來艇匪有無逆匪勾煽雷以誠奏有宿遷縣知縣
林德泉管帶廣東挖罟船行抵上海擬催令入江助剿等語此項
挖罟船隻如果尙在上海停泊可否用以攻剿閩廣匪徒之處著

卽相機辦理其嘉定滋事之案見在查辦情形若何著一併具奏
將此由六百里諭令知之○向榮許乃釗奏賊踞金陵其南門一
面以雨花臺爲犄角而雨花臺又恃城外大街爲羽翼賊目多在
街內盤踞官兵攻雨花臺賊營時逆黨卽從街中竄出包鈔是以
難於得手必先毀去大街則臺上之勢自孤惟雨花臺屢被攻剿
該逆防備愈嚴東面大路業被截斷止有鳳臺門一帶尙可繞越
前進因派提督蘇布通阿總兵虎嵩林督同副將西林遊擊蔡應
龍張國棟等挑選健卒二千人於十二日寅刻繞至雨花臺西張
國棟率勇先至街尾縱火賊從火中逸出奔雨花臺我軍追擊斃
賊甚多惟後路接應兵勇以路徑繚曲樹木叢雜僅側身而進不
能大隊擁入是役街內房屋焚去大半未逃出之賊盡行燒斃而
城上及雨花臺賊匪槍礮不絕我兵在街中者過於單薄因與各

路伏兵均仍撤回此十二日進攻南門情形也至鎮江攻剿情形
准和春等文稱初八日水師各鎮將派師船分爲四隊乘東南風
進擊北固山一帶礮隄隄前有賊船數十隻分泊守護被我軍擊
沈數隻斃賊甚多又燒毀木礮臺一座餘匪潛伏不出其瓜州北
岸均築礮隄護以礮船二百餘隻我師船乘風近前開礮擊倒望
樓二座羈沈賊船十餘隻斃賊無算隄內賊皆伏匿但聞人聲鼎
沸因風力漸微篷舵艤使不便傳令收兵和春聞江上礮聲亦卽
督兵出隊東南兩門賊皆堅閉不出惟於城上施放槍礮抵禦此
初八日鎮江水陸進攻情形也再探得南門一帶係逆匪前二軍
把守先經密飭張國樞倣製賊匪號衣數百件於進攻時遣親信
壯勇埋伏於雨花臺及南門左近專俟城內賊黨出救或外賊敗
退入城卽令該勇趁勢濶進城中俾大隊奪門而入乃該逆堅閉

不出此策未得施行止可避實擊虛別圖善術我兵連次在南門
攻擊探聞西北守城之賊又多撤赴東南見復派弁躡覓路途務
使有隙可乘期在必得 上諭該大臣等頓兵城下爲日已久若
不別圖良策設法圍攻必致師老餉匱其患何可勝言金陵揚鎮
三城該逆聯爲一氣總由不能肅清江面之故節次諭令葉名琛
等雇備船礮並令湖南湖北製造戰船其紅單船隻已抵閩洋著
令飭令和春麟桂等迅速催提駛入江口爲水陸夾攻之計至所
稱張國樑擬遣親信壯勇濶入城中爲奪門之計旣未得施行此
外有無善策可以出奇制勝著再集思廣益速奏膚功見在部庫
籌餉之艱萬分支絀大營需用甚急應如何通融協撥之處仍著
該大臣等隨時咨商怡良黃宗漢等妥籌辦理將此由六百里諭
令知之○加賞普濟堂功德林煮賑小米二百石○丙申諭內閣

昨命勝保爲欽差大臣剿辦竄擾山西逆匪各路官兵統歸節制並飭領兵大員等合力兜圍自不難迅速殲除剋期奏凱惟軍律首貴嚴明將士方能用命近覽軍營奏報鎮將備弁中或以守候軍火夫馬藉口逗遛或以防堵遠僻地方抗不遵調畏葸玩延幾至相習成風縱賊殃民深堪痛恨勝保特膺簡任總統師干果勇有爲朕所深悉著頒給康熙年閒安親王所進神雀刀由恆春齋往山西交勝保祇領如有不遵訓遣任意遷延甚至臨陣退縮貽誤軍情者提鎮以上著該大臣據實參奏聽候諭旨其副將以下各員弁卽著一面正法一面奏聞以肅軍令該大臣其嚴申紀律迅靖賊氛用副委任○諭前據僧格林沁等奏籌備察哈爾官兵禦冬衣服當降旨交內務府覈議具奏茲據奏稱擬折給銀兩錢文等語所有駐紮南苑之察哈爾官員兵丁著加恩賞給銀二百

七十六兩制錢二萬二千三十串由火器營捐輸項下給發以爲製辦冬衣之用○諭軍機大臣等副都御史文瑞奏逆賊東竄逼近直隸請飭防截要路各等語直隸與山西接壤路徑分歧疊經降旨令訥爾經額於各關隘派兵防守南路臨洺關井陘獲鹿等處固須節節嚴防其北路宣化一帶與易州紫荆關等處均爲扼要之地訥爾經額想已分路設防第恐偏僻路徑布置未能周密所派將弁不能得力設有疏失關係非輕卽如懷慶未解圍以前若西路豫設精兵何至餘匪奔擾晉境况畿疆重地密邇京師尤宜加意設備著該督查明與山西省毗連各要隘共有若干處派委各路防堵官兵係何人統帶詳細籌辦據實具奏至偵探賊蹤不可株守關口務須分派精細弁兵於前途險要處所密探確報並晝夜巡查緝拏奸宄如有難民入境卽行截回鄰省設法遣送

歸籍儻查有形迹可疑之人立拏嚴訊懲辦以期周密而肅疆圉

將此由六百里諭令知之○耆瑞以病免以富呢雅杭阿爲盛京

兵部侍郎

由盛京副都統遷

○丁酉諭軍機大臣等寄諭大學士直隸總

督訥爾經額本日據陸應穀奏晉省與直隸毗連東路則固關爲
要北路則由代州出雁門爲一路由忻州出甯武爲一路皆匯於
大同惟由五臺出龍泉關路甚便捷又有小道由代州通紫荊關
直達易州儻賊匪由此兩路奔竄關緊匪輕等語逆匪飄忽靡常
避實擣虛是其慣技易州一帶雖有秦甯鎮駐紮兵力實形單弱
該督務當派委得力鎮將統帶精兵馳赴紫荊龍泉兩路擇要防
守萬不可稍有疏忽保恆已抵固關則獲鹿井陘一路卽飭令探
明賊蹤迎頭截剿直隸與山西交界要隘甚多該督自應統籌全
局扼要調度若統兵由獲鹿入山直赴晉省儻賊從他處竄出我

軍又恐落後總當體察情形密速偵探何路緊急卽督飭官兵由何路迎剿仍隨時與勝保等互相知照毋失事機如兵力不敷分撥所有駐紮南苑之察哈爾官兵四千名駐紮天津之盛京官兵二千名均可酌量奏明調遣陸應穀摺著鈔給閱看將此由六百里加緊諭令知之○以河南睢甯陵二州縣被賊竄陷革知州梁協南吏目張守清知縣蔣大森典史周世裕職子殉節通判章光熊等祭葬世職建祠○戊戌諭軍機大臣等勝保奏馳抵平遙籌防各隘口情形一摺並繪圖貼說披覽均悉逆匪由洪洞東竄後該大臣卽督兵由霍州靈石介休一帶馳抵平遙繞出賊前並於各處隘口分撥嚴防探明該逆見在岳陽沁源縣屬地方盤踞二日欲圖他竄該大臣已咨催托明阿督兵由東南路迎擊西凌阿及郝光甲由西南路跟追調回之山西兵二千七百名令在遼州

一帶駐紮並飛調德坤雙成帶兵由澤州取道潞安一帶扼要截擊布置尙爲周匝惟賊勢剽悍異常該處隘口紛歧山西兵丁未經戰陣仍恐難資得力托明阿由澤州取道潞安著卽督兵星速前進一路探明賊蹤迎剿恩華統帶馬步各隊此時行抵何處著卽督催前進沿途偵探賊由何處分竄卽迅赴何處追剿萬不可稍事遷延致誤事機勝保身爲統帥並領給神雀刀俾肅軍令該大臣一切賞罰務須公正嚴明以期人人用命恩華托明阿幫辦軍務均屬責無旁貸其各同心協力迅掃賊氛山西與直隸交界要隘甚多恐賊匪被剿窮蹙又從山徑乘虛竄出必須四面兜截聚而殲旃萬不可稍有延誤將此由六百里加緊諭令知之○已亥諭內閣易榮奏查勘秋禾被災情形一摺本年甘肅省甯朔甯夏靈州平羅中衛等州縣因夏秋暴雨山水斗發渠流泛溢淹沒

田禾民房並鄉倉分儲糧石人畜均有淹斃復有被雹之處情形較重殊堪憫惻見經該署督委員馳往會同該府縣查勘著卽飭令宣洩積水妥爲撫恤其應如何蠲緩之處著卽查明據實具奏其被旱被雹之皋蘭等州縣被雹之洮州等廳州縣被旱之隴西等州縣及被雹被旱之安定縣或續得雨澤或被災較輕並著該署督一併迅速查明分別覈辦用副朕軫念民依至意○諭軍機大臣等慧成奏行抵揚州畱兵協同防剿一招揚城東北一帶勇多兵少慧成見已行至灣頭著將所帶之宣化陝西兵九百五十名駐紮該處會同雷以誠福濟等相機堵剿其和州堵禦亦關緊要既據慧成飭令常清管帶青州官兵八百餘名先行馳往扼要截剿卽飛催前進毋令稍涉遷延致有貽誤至城內賊糧將盡窮蹙思竄勢所必至該大臣等亟宜妥籌協剿合力進攻萬不可再

事稽遲致令乘虛竄逸琦善身爲總統陳金綬雷以誠均係幫辦
慧成福濟督兵協剿雖分路紮營而所辦共此一事儻稍存畛域
之見不能勦力同心滅此窮寇無論該逆由何路竄出該大臣等
均不能辭罪半載以來老師糜餉叢爾揚城不能迅圖克復豈坐
待賊匪全竄又復滋蔓他處乃以收復城池入奏爲卸責地步耶
將此由六百里諭令知之○論據托明阿奏剿賊獲勝因傷請假
一摺該將軍由澤州翻山迎剿於屯留縣豐儀鎮地方遇賊接仗
擊斃二百數十名追殺五六十名剿辦甚爲得手該將軍被槍子
穿帽受傷猶忍痛督兵鏖戰獲勝甚屬可嘉見在傷痕是否平復
朕心實深懸繫著將朕是日所佩之大荷包一對小刀一把由驛
寄去賞給托明阿並頒賞五等淺八兩給假調養該將軍素性勇
敢老當益壯惟盼醫治速痊以慰朕念明慶打仗多次奮勇出力

著卽賞還副都統所有該將軍見帶官兵卽令明慶暫行統帶趕
緊進剿不准稍有延緩並著勝保酌派熟悉軍情之大員飭往托
明阿軍營幫同明慶相機調度見在賊竄屯畱距潞安甚近似有
回竄東南之勢惟數止千餘又似分股旁竄而大股尙在迤北勝
保旣由平遙進兵定能嚴扼北路其南路追兵萬勿稍遲恩華見
抵何處著勝保再行飛催務令兼程前進南北夾擊庶餘孽得以
全數殲擒至翻山敗竄之賊見往何處臂受槍傷之佐領巴揚阿
是否平復均著查明具奏將此由六百里加緊各諭令知之○庚
子諭內閣給事中賈世行奏各省實缺人員無輕徵調以杜規避
一摺前曾通諭各督撫慎簡賢員凡撫馭有方人地相宜者准其
奏請給予升銜仍畱本任原因地方官吏非久於其任不能於地
勢民情周知熟悉因念軍興以來府縣之失守城池者多藉詞防

堵他處或調赴軍營差委雖事後照例分別治罪而該員轉得避重就輕遂其取巧之計卽如歸德府知府陳介眉調離本任該郡官紳遂有開門逃避之事懷慶府縣合力固守而城池賴以保全孰得孰失昭然共著見在被擾地方舉行團練若將實缺人員調赴他處其暫行署事者不能熟悉地方情形防剿安能得力嗣後著各直省督撫於府廳州縣實缺人員隨時察看除人地不宜例得酌調外其有整飭地方著有成效者非他處情形緊要人地實在相需毋得輕爲更調以杜規避而專責成將此通諭知之○戶部議覆欽差大臣湖北提督向榮等奏請將江蘇各屬捐項典本提充軍餉並漕米折銀轉運章程擬准將蘇松各屬捐項及典本催提動用江北各款除場竈一項由部另行撥用外其各州縣收捐銀錢存典本息均准劃分一半解充金陵鎮江兵餉仍畱一半

爲江北各路糧臺待支之用其徵存漕米請將道途稍遠各州縣每石變價折銀一兩覈算以昭畫一惟正供之外仍有耗米及應徵漕項米銀各款仍應出另算責令各州縣按數徵解備充軍餉以免牽混至所稱各捐局均宜仿照籌餉例減二成收捐應如所奏辦理從之○辛丑諭軍機大臣等張芾奏逆匪攻陷饒州府城擾及樂平縣並土匪圍撲吉安府城各摺片見在江西省城尙未解圍省外郡縣屢遭擾害分兵旣恐力單籌餉又虞不繼朕心實深懸繫著張芾嚴飭地方文武督率紳民兵勇等同心勦力共圖保衛總兵阿隆阿趕到吉安相機進剿湖南候補道夏廷樾亦已赴援著卽飭該鎮道合力攻剿及早殲除饒州樂平均著分派兵勇迅往剿辦其泰和萬安等處土匪著一體防剿毋致滋蔓又另片奏請截留軍餉並飭籌款撥解等語已飭戶部籌議當此需

餉孔亟之時支絀情形該撫旣已深悉若專恃部撥儻指款一時未能卽到豈可坐誤事機設局勸捐激勵士民勢不能不藉資羣力或酌量行用鈔票銀錢並用虛實相權亦可有濟所屬地方被擾各屬固應酌量奏請蠲緩其餘州縣應行徵解各款仍須設法趕緊催解以濟軍儲據稱儘徵儘解地丁正款從來無此辦法卽鹽課關稅亦不能開此弊竇也其粵海關解赴江南大營銀十五萬兩准其暫行截畱備用各省糧臺均係緊要軍需該撫爲一省計朕爲天下計能不統籌全局耶至前調廣東兵二千名是否前來與贛州文武會合截剿饒州府賊匪見在如何剿辦均著隨時奏報將此由六百里諭知張芾並諭陳孚恩江忠源知之○陝西提督桂明奏賊偏陝境沿河船隻均已撤盡得旨緊急軍務不可不加倍從嚴所擬極是○琦善等奏揚州賊匪思竄堵剿獲勝得

旨東路欲竄早在意中琦善斷不能辭責緩緩待之俾賊盡出以收復入奏是何肺腑豈不能力陷堅城盡殲醜類即使稍有餘波汝等功過尙足相抵自饗尙阿一誤之後再誤者琦善也琦善老而無志若再不知愧奮朕必用從前賜饗尙阿之退必隆刀將汝正法○兼署閩浙總督福州將軍有鳳奏臺灣鳳山縣城收復見在籌辦情形得旨覽奏各情均悉臺地軍餉甚屬緊要既能設法通融妥辦甚好捐數較多者速行奏請恩施○贈江西陣亡知府王本梧道銜與陣亡知縣沈衍慶李仁元均予祭葬世職建祠高安縣殉節署知縣胡光輔祭葬世職○壬寅諭軍機大臣等據恩華郭夢齡奏報賊匪於二十三日攻陷潞城全數奔竄黎城欲由該處出口徑撲河南等語黎城與河南武安直隸邢臺皆屬接界托明阿西凌阿明慶蘊秀等據稱帶兵緊追何以未能堵截致賊

旁竄此時該大臣是否仍在平遙抑係督兵進剿未據奏報寶深懸繫據恩華奏行抵襄垣擬由固關徑入直隸迎頭截擊是否不至紆回遲誤著勝保迅卽統籌全局應如何扼要堵擊不令竄入直境並合力夾擊之處相機調度辦理賊情詭詐勢甚剽疾勝保等統兵遏其北竄太原之路安知賊匪不避實襲虛橫出山口由豫境擾及直隸境內著該大臣隨時飛咨訥爾經額並嚴飭派守隘口官兵認真堵截無稍大意將此由六百里加緊諭令知之○向榮等奏報上海川沙等廳縣失守撥兵進剿得旨數日間四縣接連失守深堪詫異除業經自縊之地方官有無逃避者著迅速查明向榮雖日久無功而金陵賊匪尙不至肆意竄往下游此時斷斷不可罷營○是月展緩湖南被擾各州縣上年逋賦